

9496

ԱՐՄԱՆ



ՄԵՍՐՈՊ ՄԱԳԻՍՏՐՈՍ

Կենսագրական ակնարկ

ՀԱՅԱՍՏԱՆԻ ԹՈՒՆԻ ՀԱՄԱԳՐԱԴԱՐԱՆ

Թ Ի Յ Լ Ի Ձ

Էնկադեմիա ակ. օր. Ե. Աղանեսյի Պոլից. 7.

1911

281.6գ.

Մ-64գ.

5 8 FEB 2003



4 NOV 2000

ԱՐՄԱՆ

920

4-29

281.69
Մ-64Ա.

ՄԵՍՐՈՊ ՄԱԳԻՍՏՐՈՍ

Կենսագրական ակնարկ

ՀԱՅԱՍՏԱՆԻ ԽՈՐՀԱՆՐԱՊԵՏՈՒԹՅԱՆ ՄԻ ԽՈՐԷՐ ՀԱՄԱԿԱՐԳՆԵՐԻ

1005
22274
2072


Թ Ի Յ Լ Ի Զ

Էլեկտրագրավատ. թղթ. Ե. Ա. Ղազարյանի Պոլիգ. 7.


1911

26 FEB 2013

9496



ՄԵՍՐՈՊ ԵՊԻՍԿՈՊՈՍ



ԱՊՐԱՆԱԾԱԿԱՆ ԳԻՏՈՒԹՅՈՒՆ

ՄԵՍՐՈՊ ՄԱԳԻՍՏՐՈՍ

Կաթողիկոսական թեկնածուներ շարքում
առաջնակարգ տեղ է գրաւում Մեսրոպ եպիս-
կոպոս Տէր-Մովսիսեանը: Նա մեր այն կրթած
հոգևորականների թւին է պատկանում, որոնք
յարատե գործունէութեան զարմանալի եռանդով
լցած, երբէք չեն թմրկահարել ու աշխարհին
իրենց գործունէութիւնը ցոյց տալու սին փառ-
քով լցած չեն եղել: Այդ պատճառով է, որ մեր
երիտասարդ կրթած հոգևորականների շարքում
աւագագոյնը լինելով ըստ տարիքի և ամենա-
գործունեան հանդիսանալով, ամենից քիչ է խօ-
սել տւել իր մասին: Այնուամենայնիւ նրա
գործերը պատմութեան սեփականութիւն են
դարձել, թէև դեռ չհրատարակած ու հասարա-
կութեան լայն խաւերի սեփականութիւն չդար-
ձած: Սակայն նրա համառօտ կենսագրականն էլ
բաւական է համոզելու հայ հասարակութեանը,
որ այս անձնաւորութիւնը թէ իր պատրաստա-
կանութեամբ, թէ վարչական ընդունակութեամբ
և թէ մեր անցեալի խոր գիտակցութեամբ մի-
անգամայն արժանի է բազմելու այն գահին, ո-
րի հոգսով զբաղւած է հայութիւնը այժմ: Աւե-

լացնենք սրան, որ Մեսրոպ եպիսկոպոսը իր այս բոլոր արժանիքների հետ ունի այն առաւելութիւնը եւ, որ ժողովրդական սկզբունքների ամենայամառ կողմնակից է, որ ապացուցել է ոչ թէ ճառերով ու յօդաձեւերով, այլ գործնական քայլերով: Փաստերի թեթեւ յիշատակութիւնը միայն բաւական է ցոյց տալու, որ մեր յիշած առաւելութիւնները, նրա հասցէին շուրջ ամսականներ չեն, այլ նրա անբաժան յատկութիւնները: Դրա համար էլ ուղղակի կանցնենք Մեսրոպ եպիսկոպոսի գործունէութեան համառօտ պատկերին:

1

Մեսրոպ եպիսկոպոս Տէր-Մովսիսեանը ծնւել է 1865 թւին, Տաթևի վիճակի Շիկահող գիւղում: Շուշու թեմական դպրանոցում սովորելուց յետոյ տեղափոխւեց Թիֆլիզ և աւարտելով Ներսիսեան դպրանոցը, 1885 թւին ստացաւ 7-րդ դասարանի վկայական—այդ ժամանակ Ներսիսեան դպրանոցը բացի վեց դասարանեան դասընթացից ունէր նաև լրացուցիչ 7-րդ դասարան՝ մանկավարժական, հոգեբանական և այլ մասնագիտական ճիւղերով: Այսպիսով Մեսրոպ եպիսկոպոսը իր սկզբնական և միջնակարգ կրթութիւնն ստացաւ հայկական հողի վրայ և իր ժամանակի ամենալաւ միջնակարգ դպրանոցում: Սակայն նա չբաւականացաւ հայկական

կրթութեամբ և պատրաստւելով ռուսական գիմնազիոնի ծրագրով, գնաց Ռեւել և քննութիւն տալով ձեռք բերեց գիմնազիայի վկայական, որով և հնարաւորութիւն ստացաւ մտնել համալսարան:

Հայ գրական ու հասարակական կեանքի մէջ այնպէս խոշոր դեր խաղացած Դորպատը դէպի ինքը քաշեց պատանի Մեսրոպին և նա մտնելով Դորպատի համալսարանը, իբրև մասնագիտութիւն ընտրեց լեզուագիտական ճիւղը (կլասիքական լեզուների): Համալսարանի լրիւ դասընթացն աւարտեց 1891 թւին և իբրև աւարտական շարագրութիւն գրեց յունական հրեանագիտութեան մասին: Նրա այս շարագրութիւնն այնքան յաջող էր, որ նա ստացաւ ոսկէ մեդալ: Զորս տարի սովորեց համալսարանում՝ առաջին տարին Սանասարեանի հաշուի, իսկ վերջին երեք տարին Կովկասեան Հայոց Բարեգործական Ընկերութեան միջոցներով:

Սակայն այս կրթութիւնն էլ չի յագեցնում երիտասարդ Մեսրոպի ուսման ծարաւը, և նա ձգտում է արտասահմանեան կրթութիւն ևս ձեռք բերել: Դրա համար նա 1891 թւին Դորպատից գնաց Վիեննա և 8 ամիս շարունակ թէ համասարանի դասախօսութիւններին յաճախեց և թէ պարապեց այնտեղի գրադարանի ռուսամասի լրութեամբ: Այդտեղից գնաց Պարիզ, բայց երկար չկարողացաւ մնալ և հրաւեր ստանալով ձե-

մարանի տեսուչ Արիստակէս Եպիսկոպոս Սեդ-
րակեանից, 1892 թւին վերադարձաւ Էջմիածին
և ստանձնեց հայագիտական առարկաների դա-
սատւի պաշտօն: Չնայելով իր բարձր կրթու-
թեանն ու ուսուցչական ասպարէզում ցոյց տը-
լած հմտութեանը, Մեսրոպ Եպիսկոպոսը թողեց
շուտով այդ ասպարէզը: Ինչպէս յայտնի է, այդ
ժամանակ կրթւած հոգևորականների մեծ պա-
հանջ էր զգացուում, մանաւանդ որ աշխարհա-
կան ինտելիգենցիան գործունէութեան լայն ու
ազատ ասպարէզ չուներ: Մի տարի ուսուցչու-
թիւն անելուց յետոյ նա հրաժարւեց այդ պաշ-
տօնից և 1893 թւի մայիսին ձեռնադրւեց վար-
դապետ, 1894 թւին զնաց մասնակցելու Խնս-
պրուզում գումարւած անտրոպոլոգների կոնգրէ-
սին և ժնկում տեղի ունեցած օրինատալիստնե-
րի կոնգրէսին: Օգտւելով իր 6 ամիս տևող այդ
ճանապարհորդութիւնից, Մեսրոպ վարդապետը
աշխատեց ծանօթանալ Պարիզի, Լոնդոնի և Բեռ-
լինի հուշակաւոր մատենադարանների հետ և մաս-
նաւորապէս ուսումնասիրել արեւելագիտութեանը
վերաբերող ճիւղերը:

Ինչպէս յայտնի է, 1895-ին Գոլիցինի
ժամանակ փակւեցին մեր եկեղեցական-ծխա-
կան դպրոցները: Մակայն Երևանի թեմում
բաւականաչափ դպրոցներ բաց էին մնացել
ծրագրական որոշ տարբերութեան շնորհիւ,
ահա այդ դպրոցներին ընդհանուր տեսուչ նը-

շանակւեց Մեսրոպ վարդապետը Եւրոպայից
վերադառնալուց յետոյ. դժբախտաբար հետեւեալ
տարի այդ դպրոցներն էլ փակւեցին և տեսչու-
թեան պաշտօնը վերացաւ: 1896 թւին նշանակ-
ւեց Շուշու թեմական դպրոցի տեսուչ, բայց
կղերական բանակի ոսանձգութիւնների շնորհիւ մի
տարուց յետոյ կաթողիկոսը հրաժարեցրեց նրան
այդ պաշտօնից: Այս բանն այնպէս վատ ազդեց
ազատամիտ բանակի վրայ, որ հասարակական
կարծիքի ազդեցութեան տակ հոգաբարձական
կազմն էլ հրաժարական տւեց տեսչի պատճա-
ռով:

Այնուհետև Մեսրոպին մնում էր մի որևէ
զաւառական անկիւնում յաջորդի կամ գործա-
կալի համեստ պաշտօնի մէջ ամփոփել իր ամ-
բողջ գիտութիւնը: Նրան նշանակեցին Շամախու
թեմի կոնսիստորիայի նախանդամ. սակայն այդ
պաշտօնը նրա գործունէութիւն որոնող հոգուն
բաւականութիւն չէր տալիս: Եւ տարին լրացնե-
լով հրաժարւեց իր պաշտօնից ու նորից իր պատ-
րաստւելու, հիմնաւոր գիտութիւն ձեռք բերելու
յետեւից ելաւ: Այդ նպատակով նա ուղևորւեց
Պետերբուրգ, պատրաստւեց և 1902 թւին դիս-
երտացիա պաշտպանելով արևելեան ֆակուլտե-
տում, ստացաւ մագիստրոսական աստիճանի
տիտղոսը: Չը մոռանանք յիշել այստեղ, որ այդ
աստիճանին պատրաստւելու ընթացքում նա նը-
պաստ ստացել է Ադ. Մանթաշեանից, Հ. Մելի-

քեանից և Պետերբուրգի եկեղեցական խորհրդից:

Այսպիսով մագիստրոսական տիտղոսն ստացած Մեսրոպ վարդապետը նորից վերադարձաւ Էջմիածին, նոր եռանդով, գործունէութեան նոր ու լայն ասպարէզի վառ յոյսերով: Բայց այդ ժամանակ, ինչպէս յայտնի է, Էջմիածնի կղերամիտ մասը բոլոր գործերն իր ձեռքն էր առել և քիչ թէ շատ ազատամիտ հոգեւորականին հալածում էր անխնայ կերպով: Ժամանակի ոգին մի կողմից, տիրող Գալիցիներէն ու ժողովրդական պահանջողական խաւարամիտ բանակին թե ու թիկունք էին տալիս: Եւ Խրիմեանի նման ազատամիտ ու ամբողջ հոգով ժողովրդական մարզն անդամ անկարող էր դիմադրել այդ արտաքուստ ու ներքուստ եկող հոտանքներին և ընդհակառակը իրեն անկարող զգալով այդ յախուռն դիմադրութեան դէմ, նա իր թիերը ցած դրեց և նաւը յանձնեց բախտի ալիքներին: Ազատամիտ հոգեւորականների ու գաղափարների հալածանքը իր աստիճանի գաղաթնակէտին հասաւ:

Եւ բնական է, որ ամենամեծ թշնամանքների ու հալածանքների զոհերից մէկն էլ Մեսրոպ վարդապետը պիտի լինէր. որովհետեւ իր լուսաւոր գաղափարների հետ ունէր նաեւ մեծ պատրաստականութիւն: Իսկ «Թշնամին» ամենից շատ պատրաստած «Թշնամուց» է գարնուրում: Խաւարամիտ բանակը ամենից շատ Արիստակէսնե-

րից ու Մեսրոպներից պիտի վախէր ու նրանց դէմ լարէր իր ճիգերը:

Եւ Արիստակէսի նման, Մեսրոպն էլ հալածեց: Նրան վանքում, թեմերում, դպրոցներում իր գիտութեան ու ուժերին համապատասխան ոչ մի պաշտօն չտւին: Բայց ճրագը ծածկոցի տակ չի կորցնի իր լոյսը և ոչ էլ խոշոր ընդունակութիւնը կը ոչնչանայ խոշընդոտների հանդէպ: Այս հալածանքը գուցէ մի ուրիշին ոչնչացնէր ու կեանքի մէջ անհետ կորցնէր, բայց Մեսրոպի պէս պատրաստած մարդու և ուժեղ բնաւորութեան համար գործունէութեան մի լայն ու փառաւոր ասպարէզ բաց արաւ:

II

Դեռ 1893 թւին, երբ ազատամիտ բանակը հրճանքի մէջ էր կաթողիկոսական ընտրութեան ժամանակ տարած իր յաղթանակի պատճառով, երբ հայ ժողովուրդը ցնծալին յոյսերով սպասում էր տեսնել իր նոր ընտրեալ Հայրիկին, և տեղապահ Ներսիս եպիսկոպոսի կարգադրութեամբ Էջմիածնից պատուիրակներ ուղարկւեցին Նրուսաղէմ, մեծ աքսորեալին այնտեղից հրաւիրելու դէպի Լուսաւորչի գահը, այդ պատուիրակութեան մէջ էր նաեւ ազատամիտ Մեսրոպը: Խրիմեանը պիտի Ռուսաստան մտնէր և Էջմիածին գար Եւրոպայի վրայով, որովհետեւ Հոմիդի ատելի աքսորականը անկարող էր Պոլիս

մաներ, թէկուզ նա լինէր մի ամբողջ ժողովրդի ընտրեալն ու ներկայացուցիչը:

Պատերազմները գնացին Երուսաղէմ, և Խրիմեանին վերցնելով, Եգիպտոսի վրայով ուղևորւեցին դէպի Եւրոպա, և Աւստրիայի մայրաքաղաքով անցան Ռուսաստան: Պատերազմների շարքում առանձնապէս աչքի ընկաւ Մեսրոպ վարդապետը, որ Խրիմեանի թարգմանի պաշտօնն էր կատարում:

Այս հետաքրքիր ճանապարհորդութեան ընդարձակ նկարագրութիւնը գրել և հրատարակել է նոյն Մեսրոպ վարդապետը, որ յիշելով ճանապարհորդութեան բոլոր մանրամասնութիւնները, միաժամանակ իր գրքին տւել է գեղարւեստական յուշատետրի բնաւորութիւն, որով և գիրքը մինչև այսօր էլ ընթերցանութեան թարմ նիւթ է:

Այնուհետև յաճախ Մեսրոպ վարդապետը Խրիմեանին իրրե թարգման, ուղեկցել է պաշտօնական այցելութիւնների ժամանակ. իսկ 1901 թւին, երբ կատարւում էր Վրաստանի միացման հարիւրամեակը Ռուսաստանի հետ և որտեղ Կայսեր ներկայացուցիչն էր Մեծ Իշխան Միխայիլ Նիկողաեիչը, Մեսրոպ վարդապետը Խրիմեանին ուղեկցեց Թիֆլիզ իր նոյն պաշտօնով և բոլոր փոխադարձ այցելութիւնների ժամանակ նրա թարգմանն էր: Եւ Խրիմեանը տեսնում էր թէ երիտասարդ վարդապետը որքան լրջութեամբ ու վարպետութեամբ կարողանում է կատարել

այդ ծանր ու պատասխանատու պաշտօնը: Մենք այդ պաշտօնը—կաթողիկոսի թարգմանի պաշտօնը—անւանում ենք ծանր ու պատասխանատու, որովհետև այն օրից, երբ Էջմիածինը Ռուսաստանի իշխանութեան տակ է մտել, հայ կաթողիկոսները ուղղակի խաղալիք են դարձած եղել իրենց պարտականութիւնը հասկացող կամ ապիկար թարգմանների ձեռքին: Դեռ Ներսէս Աշտարակցին 70—80 տարի սրանից առաջ զգլած այդ թարգմանիչների անկարողութիւնից, ծեւրութեան հասակում ստիպւած սովորեց ուսաց լեզուն, որպէսզի կարողանայ իր մտքերը իսկութեամբ յայտնել կառավարութեան ներկայացուցիչներին պաշտօնական այցելութիւնների ժամանակ: Եւ ահա Խրիմեանը, որ ոչ միայն ուսաց լեզւին էր անծանօթ, այլ և ուսու կեանքին ու քաղաքականութեանը անտեղեակ, Մեսրոպ վարդապետի մէջ տեսնում է այն անձնաւորութիւնը, որին կարող էր ամբողջովին վստահել իր իսկական մտքերը հաղորդելու համար կառավարչական պաշտօնեաներին:

Սրա շնորհիւ էր նաև, որ դեռ 1896 թւի Ն. Կ. Մ. Նիկողայոս Բ. Կայսեր թագադրութեան ժամանակ Ամենայն Հայոց Կաթողիկոսի ներկայացուցիչ Երեմիա Էպիսկոպոսի հետ Պետերբուրգ գնաց թարգմանի պաշտօնով նաև Մեսրոպ վարդապետը:

Այդ բոլոր ճանապարհորդութիւնների և այ-

ցելութիւնների ժամանակ, Մեսրոպ վարդապետը իբրև խելահաս քաղաքագէտ ու վստահելի թարգման այնպէս նշանակալից դարձաւ Խորմեանի աչքում, որ վշտահար ու յուսաբեկ կաթողիկոսը միակ յարմար անձնաւորութիւն Մեսրոպ վարդապետին գտաւ Պետերբուրգ ուղարկելու, հայ ժողովրդի ամենացաւոտ խոցի բժշկութեան համար: Դա դպրոցների վերաբացման և գրաւած եկեղեցական կալաւածների վերադարձման ինդիքն էր, որ այնպէս ծանր կապարի պէս նստել էր հայ ժողովրդի սրտին և նրա համար նոր տառապանքների գուռն էր բաց արել: Մեսրոպ եպիսկոպոսը 1904 թւի գեկտեմբերին ուղևորւեց Պետերբուրգ և այդ ամսից մինչև յաջորդ տարւայ մայիսը անդու աշխատանք թափեց կալաւածների վերադարձը և դպրոցների վերաբացումը յաջողեցնելու համար:

Եւ իզուր չէին Խորմեանի յոյսերը: Մեսրոպը նախ քան պաշտօնական անձնաւորութիւններին տեսնելը, խորագէտ քաղաքականութեամբ աշխատեց մայրաքաղաքի հասարակական կարծիքը մշակել յօգուտ հայ ժողովրդի դատի: Նա գիտէր թէ ինչ դեր է խաղում պահպանողական և յետադէմ մամուլը ժամանակակից բարձր շրջանների վրայ, ուստի իր բոլոր ուշքը դարձրեց այդ ուղղութեամբ: Նա յարաբերութիւններ հաստատեց բարձր շրջանների միտքը ղեկավարող մամուլի ներկայացուցիչների հետ, պարզեց նրանց

հայ ժողովրդի իսկակար գրութիւնն ու վերաբերմունքը դպրոցների փակման և կալաւածների գրաւման հանդէպ: Աշխատեց համոզել, որ հայ դպրոցների փակումով ոչ միայն հայ ժողովուրդը, այլև պետութիւնը մեծապէս ֆուսուում է, հազարաւոր մանուկներ վայրենի մեծացնելով: Փաստերով ու մանրամասն հաշիւներով կարողացաւ նոյն իսկ օտարակեր մամուլի ղեկավարներին ցոյց տալ, որ հայ եկեղեցական կալաւածները ոչ միայն պետական բիւջէի տեսակէտից մի չնչին գումարի արդիւնք են ներկայացնում, այլև իրենց գոյութիւնը հազիւ պահպանելով, անկարող են կողմնակի նպատակների ծառայել: Այս տանջալից նախապատրաստութիւնից յետոյ միայն Մեսրոպը սկսեց իր պաշտօնական այցելութիւնները պետական շրջաններին: Եւ վերջապէս նրա աշխատանքը ի զուր չանցաւ, կառավարութիւնը զիջեց և կալաւածների հետ եկեղեցական-ծխական դպրոցները ևս կարճ ժամանակից յետոյ վերադարձւեցին հայ ժողովրդին:

Կառավարութիւնը եկեղեցական-ծխական դպրոցները վերադարձրեց այն պայմանով, որ Կովկասեան փոխարքայի և կաթողիկոսի փոխադարձ համաձայնութեամբ կանոններ մշակւեն և և դպրոցները այդ կանոններով ղեկավարւեն. Խորմեանը յատուկ կոնդակով մի յանձնաժողով նշանակեց, որը պիտի կանոններ մշակէր և ներկայացնէր Փոխարքային: Բնական է, որ Մես-

րոպ վարդապետը պիտի գտնուէր անշուշտ այս յանձնաժողովի մէջ, քանի որ վերաբացւած դպրոցների գործը նրա սրտին չափազանց մօտ էր, որովհետեւ այդ դպրոցների վերադարձման ժամանակ բոլոր դառնութիւնները նա ճաշակել էր: Բայց հէնց այդ ուրախութեան ու հրճանքի թւականին էր, որ կովկասահայի ժամանակաւոր ժպիտը յանկարծ քարացաւ, և այդ դժբախտ ժողովրդի համար սկսեցին սոսկումի ու զարհուրանքի օրեր: Սկսեցին թուրք-հայկական ընդհարումները. հայերը չէին կարող դպրոցների վայելումով զբաղւել, դպրոցական խնդիրը ոչ միայն իր սրութիւնը կորցրեց, այլև այժմէութիւնը: Մեսրոպի հայրենասէր սիրտը չէր կարող այդ սարսուռների հանգէպ լուռ ու անտարբեր նստել և կաբինետային աշխատանքով զբաղւել, մանաւանդ որ ահաբեկւած վայրերը նրան կանչում էին: Ժողովրդական կսկիծն այնքան մեծ էր, որ եղած ձեռքերը օգնութիւն հասցնելու անհնարինութեան էին մատնւած: Ժողովրդին միխթարելու, նրա կսկիծներն սփոփելու և մանաւանդ կառավարութեան ուշքը նրա վրայ դարձնելու համար հարկաւոր էին բազմաթիւ անձնագոհ ու խելահաս ձեռքեր: Այդ էր պատճառը, որ չնայելով Կարապետ ու Թովմա վարդապետների ներկայութեանը, Հին-Նախիջևանի ժողովուրդը խնդրեց կաթողիկոսից Մեսրոպին ևս ուղարկել այնտեղ: Չնայելով Կարապետ

վարդապետի եռանդուն գործունէութեանը, Նախիջևանի ժողովուրդն զգում էր նաև Մեսրոպի պէս մի անձնաւորութեան ներկայութեան պահանջը, որ անցեալում բաւականաչափ ապացոյցներ էր տւել արդէն խելացի քաղաքականութեան:

Եւ Մեսրոպը մի րոպէ մոռացած դպրոցական խնդիրը, շտապեց Նախիջևան և ամբողջովին նւիրւեց ժողովրդի սփոփանքի ու ապահովութեան գործին: Նա մնաց այդտեղ մինչև 1906 թւի կէսերը, որից յետոյ անցաւ իր հայրենի Ջանգեղուրի շրջանը և մինչև նոյն թւի վերջերը մնաց Ջանգեղուրում: Այդ ժամանակաւ թերթերում և մասնաւորապէս «Մշակի» էջերում նկարագրւած է Մեսրոպ վարդապետի սրտացաւ ու հայրախնամ գործունէութիւնը այդ սև օրերում: Մեսրոպը այս ասպարէզում էլ ցոյց տւեց, որ ինքը որքան ժողովրդի տառապանքներով տոգորւելու զգայուն սիրտ ունի, նոյնքան և առողջ ու խելահաս միտք ունի պետական պաշտօնեաների հետ մի խելացի յարաբերութիւն մշակելու համար:

Այսպիսով Մեսրոպ վարդապետը իր վրայ գրւած բոլոր ժամանակաւոր յանձնարարութիւնները կատարեց օրինակելի ճշտապահութեամբ և իր պարտականութիւնը խորապէս գիտակցող մարդու անձնութեամբ. այստեղից էլ մեր հոգեւոր բարձր շրջաններում կազմւեց այն համոզմունքը, թէ ուսում կառավարութեան հետ պաշ-

տօնական յարաբերութիւնները վարելու համար յարմարագոյն անձնաւորութիւնը Մեսրոպ վարդապետն է: Եւ գիտնական վարդապետը դարձաւ էջմիածնայ դիւանի՝ այսպէս ասած՝ «յատուկ յանձնարարութիւնների պաշտօնեան» ու էջմիածնի ներկայացուցիչը պետութեան առաջ:

Եթէ աչքի առաջ ունենաք, որ էջմիածինը ամենից առաջ մի պաշտօնական վայր է, որը ամեն օր թարմ յարաբերութիւն պիտի պահպանէ կառավարչական ատեանների հետ, եթէ աչքի ունենաք, որ էջմիածինը ամենից առաջ միակ ներկայացուցիչն է հայ հոգևոր և ազգային — կուլտուրական մի շարք գործերի, այն ժամանակ մեզ համար հասկանալի կը լինի, թէ ինչպիսի պարտականութիւններ կան դրած էջմիածնի ներկայացուցիչը հանդիսացող այգալիսի անձնաւորութեան վրայ: Բոլոր պաշտօնական յարաբերութիւնները, ճիշտ է, սինոդը և թէ մանաւանդ կաթողիկոսը պիտի ունենան իրենց յատուկ ներկայացուցիչը: Մի քանի անգամ նոյնիսկ հարց է բարձրացել՝ սինոդն է պահպանում, սակայն թէ Պետերբուրգում կաթողիկոսի յատուկ ներկայացուցչութեան պաշտօն հիմնելու վերաբերմամբ: Այս կարևոր պաշտօնը վերջին տարիներում կատարել է Մեսրոպ վարդապետը և, ինչպէս յիշեցինք, շարունակ պատուով է գլուխ եկել իր պարտականութեան տակից: Խրիմեանի մահից յետոյ, Գէորգ ս. Սուրենեանի

առաջին տեղակալութեան օրով, Իգմիրլեան Կաթողիկոսի ժամանակ և մինչև այսօր էլ այդ պաշտօնը բացառապէս կատարում է Մեսրոպ սրբազանը:

Այսպէս՝ 1908 թւին, երբ եկեղեցական-ծխական դպրոցների կանոնադրութեան մշակման հարցը նորից հրապարակ եկաւ, տեղակալ Գէորգ սրբազանի կարգադրութեամբ Մեսրոպ վարդապետը ևս մտաւ կանոններ մշակող յանձնաժողովի մէջ: Դժբախտաբար այս յանձնաժողովը չկարողացաւ ընդհանուր համաձայնութեան գալ և Մեսրոպն ստիպւած եղաւ հրաժարել անդամութիւնից:

Նոյն թւին Մեսրոպ վարդապետը տեղակալի կողմից կարգւեց իբրեւ պատւիրակ և թարգման նորընտիր Իգմիրլեան հայրապետին Պօլսից Պետերբուրգ և Պետերբուրգից էջմիածին ուղեկցելու համար: Իսկ 1909 թւին կաթողիկոսի կողմից ներկայացուցիչ նշանակւեց Մեծ իշխան Միխայիլ Նիկողանչի թաղմանը ներկայ լինելու համար:

Այս ճանապարհորդութիւնների և շփումների ընթացքում Իգմիրլեան վեհափառը կարողացաւ նկատել Մեսրոպ վարդապետի պատրաստականութիւնը, ժողովրդական սկզբունքների կուսակից լինելը և մանաւանդ նրա նուրբ դիւանագիտական շնորհքը: Այնպէս որ, իր հայրապետութեան հէնց առաջին օրերում հաստատեց իր դիւանի խորհրդի անդամ, նրան վերապահե-

լով և սինոդի անդամութիւնը (այդ ժամանակ Մեսրոպ վարդապետը սինոդի անդամ էր), և կարճ ժամանակից յետոյ, այն է 1909 թւինոյեմբերի 25-ին նրան ձեռնադրեց եպիսկոպոս:

Այնուհետեւ Մեսրոպ եպիսկոպոսը միայնակ մնացած վշտահար հայրապետի մխիթարիչն ու նրա ժողովրդավար սկզբունքների գլխաւոր իրագործողն էր:

III

Դառն ժամանակներ վրայ հասան ծերունի հայրապետի համար: Աքսորավայրից Պոլսի պատրիարքական գահը բարձրացաւ ազատագրւած թիւրքահայ ժողովրդի միաձայն քւէով. և պատրիարքական աթոռից ընդհանուր հայութեան միահամուռ ցանկութեամբ եկաւ բազմելու ընդհանրական հայրապետի գահի վրայ: Եւ ծերունի արծիւը ոգևորւած ու լի յոյսերով իր թոխչքն ուղղեց դէպի էջմիածին:

Սակայն ապերախտ էջմիածինը, դեռ պարսկական տիրապետութեան օրերից մնացած ինտրիգների այդ կլասիք բունը, հէնց առաջին օրից կտրեց նրա թևերը: Հին կղերական ոգին նորից գլուխը բարձրացրեց և իր սեղէմը սկսեց ցոյց տալ, հետզհետէ աւելի ու աւելի յանդգնութեան հասնելով:

Հայրապետի իւրաքանչիւր կարգադրութիւն, որ ժողովրդական սկզբունքներից էր բղխում, առասելի արգելքների սկսեց հանդիպել: Նորընտիր հայրապետը, որ կըթւած ժողովրդական սկզբունքների դպրոցում և հոգով ժողովրդավար լինելով, դպրոցական, կալւածական, եկեղեցական բոլոր գործերը ցանկանում էր ժողովրդական ներկայացուցիչների ձեռքով կառավարել,

անկարծ մի շտեմնաձ զիմադրութեան հանդիպեց կղերամիտ-պահպանողական բանակի կողմից, որ հետզհետեւ աւելի ու աւելի էր կազմակերպւում:

Նա ուզում էր իր բոլոր ծրագիրները, մրտաճոռները էջմիածնի միաբանութեան, իրեն անմիջական իրաւասութեանը ենթարկող միաբանութեան միջոցով իրագործել: սակայն նրա ամենամեծ թշնամին հէնց այդ միաբանութիւնը հանդիսացաւ: Դեռ զիւանը կառավարող խորհրդի ընտրութիւնը հրապարակօրէն, մամուլի մէջ ծաղրեց և այնուհետև իւրաքանչիւր ընտրական ձև մերժեց ու հայ եկեղեցու ոգուն խորթ հոշակեց: Այդ բանակը զինեց թեմական խորհուրդների դէմ, առաջնորդական ընտրութիւնների դէմ, մի խօսքով այն բոլոր մարմինների դէմ, որոնք գոյութիւն են ստանում ժողովրդական քէներով կամ ժողովրդի մասնակցութեամբ: Հայրապետի դէմ թշնամութիւնը սաստկացաւ, և վանքի պատերից դուրս գալով, ընդարձակ ծաւալ ստացաւ: Այդ թշնամութիւնը կրկնակի քաջալերութիւն ստացաւ Թիֆլիզից և Պոլսից եկող հին թշնամութիւնից: Այդ հակառակորդութիւնը, թշնամութիւնը բացարձակ, հրապարակային կերպարանք ստացաւ: Կղերամիտ մամուլը մի կողմից և մասնաւոր նամակները միւս կողմից սկսեցին հայհոյանքի հուր ու շանթ տեղալ ժողովրդի միաձայն քէնով ընտրւած, պատ-

կառելի անցեալ ունեցող, ազնիւ հայրապետի հասցէին:

Քիչ մարդիկ կային, որոնք կարող էին վշտակիր հայրապետի սկզբունքներին համակիր և նրան անկեղծ բարեկամ լինել: Դրանք այսօր էլ հրապարակի վրայ են՝ Մեսրոպ և Խորէն եպիսկոպոսներ, Բագրատ վարդապետ և մի երկու միաբան, իսկ հին հոգևորականներից միմիայն Գէորգ արքեպիսկոպոս Սուրէնեան: Դրանցից Իգմիրեանի ամենամօտ բարեկամը, ընդհանուր բարեփոխութեան խնդրում նրա ծրագիրներն իրագործողը հանդիսացաւ Մեսրոպ եպիսկոպոսը: Եւ այսքան քիչ մարդկանցով ձերուսի հայրապետը արաւ, ինչ որ կարող էր անել այդ պայմաններում, մինչև իր ողբերգական վախճանը:

Սկիզբն դրեց մի շարք գեղեցիկ ձեռնարկութիւնների, որոնք դժբախտաբար կիսատ և անորոշ մնացին մինչև օրս: Դրանցից ամենագլխաւորը դպրոցական կանոնադրութեան հարցն էր, որ անորոշ էր մնացել դպրոցների վերաբացումից և տեղակալի օրօք կարգւած յանձնաժողովի լուծումից սկսած:

Իգմիրեանը այդ բանի վրայ ամենից առաջ մտածեց և այդ բանը գլուխ բերելու համար ամենայայտնար անձնաւորութիւնը գտաւ յանձին Մեսրոպ եպիսկոպոսի: Ինչպէս յայտնի է, 1910 թւի մայիսին Իգմիրեան հայրապետը Մեսրոպ եպիսկոպոսի ուղեկցութեամբ

անսակցութիւն ունեցաւ Ն. Կ. Մ. Փոխարքայ Կոմս Վարանցով-Դաշկովի հետ և այդ տեսակցութեան ժամանակ փոխադարձ համաձայնութեամբ ուրագծեց եկեղեցական ծխական զբաւրոցները կանոնադրութեան նախագիծը: Իզմիրլեանը և Մեսրոպ եպիսկոպոսը ձեռք ձեռքի տւած կարողացան մեր տարիներով վայելած արտօնութիւնների համապատասխան ժողովրդական զբաւրոցի կանոնադրութեան նախագիծն իրագործել: Բայց զժբախտաբար գործն այդպէս էլ մնաց Իզմիրլեանի մահւան պատճառով: Թեմական խորհուրդների խնդրում ևս ահագին գեր խաղաց Մեսրոպ եպիսկոպոսը իր մի քանի այցելութիւններով Փոխարքային:

Այսպէս ուրեմն, Մեսրոպը լինելով ժամանակակից ազատամիտ հոգեորականութեան ներկայացուցիչը, միաժամանակ էջմիածնի պաշտօնական ներկայացուցիչն էր հանդիսանում կառավարութեան առաջ, որովհետեւ ոչ մէկը մեր հոգեորականներից այս վերջին պաշտօնը չէր կարող այնպէս կատարել, ինչպէս Մեսրոպ սրբազանը:

Այս ասպարէզում ցոյց տւած նրա յատկութիւնները ուշադրութեան արժանի են, որովհետեւ նա այսօր դրւած է կաթողիկոսական ընտրելիների շարքում, իսկ այժմեան հանգամանքներում կաթողիկոսի գլխաւոր արժանիքներից

մէկը համարւում է դիւանագիտական ընդունակութիւնը:

Առանց սողալու իշխանութեան առաջ, առանց իր և իր ժողովրդի արժանապատուութիւնը ոտնահարելու, և պահելով իրեն իր դիրքի ու կոչման բարձրութեան վրայ, Մեսրոպ եպիսկոպոսը կարողացել է համոզիչ տոն ընդունել և իր բոլոր խնդիրներն ու առաջադրութիւնները իրագործել տալ: Նրա հետ գործ ունեցող պաշտօնեան, լինէր դա մինիստր թէ փոխարքայ, նահանգապետ թէ գաւառապետ, լսել է նրան, ու նրա խնդիրը կատարել, միաժամանակ մի խոր յարգանք տածելով դէպի նրա գիտութիւնն ու անձնաւորութիւնը: Այս յարգանքը առանձնապէս արտայայտւել է փոխարքայի կողմից յաճախակի տեսակցութիւնների ժամանակ: Փոխարքայի ամուսին Կոմսուհի Վարանցովա-Դաշկովան, որ սաստիկ յարգում էր հանգուցեալ Իզմիրլեանին և նրա համար մի գեղակերտ, թանկարժէք ծխատուփ էր պատրաստել, նրա մահից յետոյ այդ նւէրը տւեց Իզմիրլեանի բարեկամ ու գործակից Մեսրոպ եպիսկոպոսին, որը իր հերթին նմանապէս յարգանք էր ներշնչել Կոմսուհու մէջ:

Մօտ 20 տարի տեղոյ այս դիւանագիտական յարաբերութիւնները միանգամայն բաւական են, ցոյց տալու, թէ Մեսրոպ եպիսկոպոսը ինչպիսի

առողջ քաղաքագիտական բնգունակութեամբ է օժտւած:

Մասամբ այսպիսի դիւանագիտութեան և ամբողջապէս քրիստոնէութեան առողջ ըմբռնման հետեանք է նրա այն խօսակցութիւնը Մենշիկովի հետ, որ Մեսրոպ սրբազանի հակառակորդները խեղաթիւրեցին և ծուռ մեկնութիւններով ուղեցին նրան վարկաբեկել: Մենք աւելորդ չենք համարում այդ խօսակցութեան էութիւնը այստեղ պարզել: Մեսրոպ եպիսկոպոսը Պետերբուրգում ապրելով և յաճախ այցելելով այդ քաղաքը, բազմաթիւ մարդոց և տարբեր ուղղութեան շատ ներկայացուցիչների հետ ծանօթութիւն է հաստատել: Դրանց թւում նա ծանօթ է եղել և Մենշիկովի հետ: Եւ ահա մի անգամ հարց է բարձրանում հայ եկեղեցու մասին: Ինչպէս յայտնի է, ուստի հասարակութեան նոյնիսկ ազատամիտ մասը թիւր գաղափար ունի հայ եկեղեցու մասին, համարելով մեր եկեղեցին աղանդաւոր, հերձաւոր: Այս կարծիքը բնականօրէն աւելի արմատացած է պահպանողական խաւերում, որոնց տիպիկ ներկայացուցիչներն են Մենշիկովը: Այս ցաւը, պէտք է ասած, շատ հին է, նոյնիսկ անցեալում մեր բարձր հոգևորականներից մի քանիսը պաշտօնապէս դիմելով կառավարութեանը, խնդրել են նրա ուղադրութիւնը այս հանգամանքի վրայ, այսինքն ազգարարել ուստի հոգևորականութեան, որ

հայ եկեղեցին հերձաւոր, աղանդաւոր չէ: Խօսակցութեան ընթացքում Մենշիկովը կրկնում է այն հին առասպելը, թէ հայ եկեղեցին դուրս է կաթողիկէ եկեղեցիներից, նա իր սկզբունքներով չի մօտենում կաթողիկէ, կամ ուղղափառ եկեղեցիներին, լուսաւորչական կրօնը մի աղանդ է քրիստոնէութեան տեսակէտից: Եւ բնական էր, որ Մեսրոպ եպիսկոպոսը (այն ժամանակ վարդապետ,) իբրև մի հաւատարիմ պաշտօնեայ իր եկեղեցու, աշխատէր թիւրիմացութիւնը պարզել և նա բացատրում է այդ խնդիրը այնպէս, ինչպէս կը բացատրէր իւրաքանչիւր անկեղծ քրիստոնեայ, մանաւանդ եկեղեցու պաշտօնեայ: Նա ասում է՝ թէ հայոց եկեղեցին ոչ աղանդաւոր է և ոչ հերձաւոր. նա էլ նոյնպիսի առաքելական եկեղեցի է, ինչպէս յունականը և նոյն ծագումը ունի, ինչոր միւս քրիստոնեայ մեծ եկեղեցիները. քրիստոնէութիւնը մէկ է, բոլոր եկեղեցիների համար էլ Քրիստոսը մէկ է եղել, մարդկային տգիտութիւնն է եղել պատճառ, որ պատմական գանազան հանգամանքների ազդեցութեան տակ մի քրիստոնէութիւնից բազմաթիւ քրիստոնէութիւններ է առաջացրել: Եւ սա այնքան համոզիչ է ու ճշմարտութիւն, որ թւում է թէ ոչ մէկը չպէտք է առարկէր սրան: Բայց Մեսրոպ եպիսկոպոսի հակառակորդներից ոմանք ուղեցին ցոյց տալ, թէ այս խօսքերը ասողը պատրաստ է հայ

եկեղեցին միացնել ուրիշ եկեղեցու հետ: Թէ որքան ծիծաղելի է այսպիսի եզրակացութիւն հանելը, ցոյց է տալիս հէնց ինքը Մենշիկովը, որ շատ աւելի խելօք է, քան Մեսրոպի հակառակորդները: Ինչպէս յայտնի է, Իգմիրլեանի թաղման ժամանակ Վրաստանի էքզարխը ուղարկել էր յատուկ ներկայացուցիչ: Եւ ահա այդ առթիւ կատարած, Մենշիկովը մի անգամ էլ թոյն թափեց հայերի հասցէին: Նա գրեց «Новое Время»-ի մէջ մօտաւորապէս հետեւեալը (դժբաղդաբար այդ №-ը ձեռքի տակ չունենք որ բառացի թարգմանութիւնը տանք). — մենք զարմանում ենք թէ ինչպէս Վրաստանի էքզարխը, ուղղափառ եկեղեցու մի բարձր պաշտօնեան իր կողմից յատուկ ներկայացուցիչ է ուղարկում ադանդաւոր եկեղեցու կաթողիկոսի թաղմանը ներկայ լինելու համար — և դրան կցում՝ թէև տարիներ առաջ Մեսրոպ եպիսկոպոսը մեզ հետ խօսելիս ասաց, որ հայ և յոյն եկեղեցու մէջ էական տարբերութիւններ չկան, որ հայ եկեղեցին ադանդաւոր չէ, այլ իր ընդհանուր հիմունքներով նոյնն է, ինչ որ ռուս և յոյն եկեղեցին, սակայն մենք այդ եկեղեցին համարում ենք ադանդաւոր. ուստի էքզարխը չպիտի ներկայացուցիչ ուղարկէր հայ կաթողիկոսի թաղմանը: Ահա այս պարզ իրողութիւնն է, որ Մեսրոպի թշնամիները ոչ մի արատի մէջ չկարողանալով մեղադրել նրան, մատի փաթաթման են շինել և

անհեթեթ եզրակացութիւններով շահագործում են: Բայց ժամանակին մամուլի մէջ այդպիսիներին լաւ պատասխան տրւեց. թէ՛ եթէ այդպէս է, եթէ Մեսրոպը եկեղեցիների միութեան կողմնակից է, հապա ի՞նչու «Новое Время»-ն այսպիսի «օգտակար» մարդուն թողած, Օրմանեանի կամ Կարապետի թեկնածութիւնն է պաշտպանում:

Ոչ, սա մի անհեթեթ գրաբարտութիւն է, որ գործադրում է տգէտ մարդկանց մտքերի վրայ ազդեցութիւն անելու համար: Ընդհակառակը այդպիսի խօսակցութիւնը պատիւ է բերում Մեսրոպ եպիսկոպոսին, ինչպէս և պատիւ կը բերի իւրաքանչիւր լայնախոհ հոգևորականի:

Անցնենք սակայն Մեսրոպ մագիստրոսի գործունէութեան միւս ասպարէզին, որտեղ նա իր գիտնականութեան հետ մի մեծ եռանդ ու դերագոյն տուկոնութիւն է ցոյց տալիս:

Գուցէ զարմանալի թւայ, եթէ ասելու լինինք, որ այդ ասպարէզը մատենագրական գործունէութիւնն է: Եւ իրօք ի՞նչ մատենագրական գործունէութիւն պիտի սպասէր մի մարդուց, որը շարունակ ճանապարհորդութեան մէջ է գտնուել և երբէք մի տեղ նստած չի եղել երկար ժամանակով, որևէ մնայուն պաշտօնով: Ինքը՝ Մեսրոպն էլ, թէ վարդապետ և թէ եպիսկոպոս եղած ժամանակ կարծես «ճանապարհորդելու» մի առանձին հակումն է ցոյց տւել: Հէնց որ մի թեթև «ազատ» ժամանակ է ունեցել, հէնց որ քիչ թէ շատ երկար ժամանակ պահանջող պաշտօնը վերջացրել է, իսկոյն դիմել է դէպի ճանապարհորդութեան, ինչպէս օրինակ երբ 1906—7 ուսումնական թւին կարգւեց տեսուչ Գէորգեան ճեմարանի, տարին վերջանալուց անմիջապէս յետոյ հրաժարական տալով ուղևորւեց Եւրոպա, շրջելով Պոլիս, Երուսաղէմ, Հռոմ, Պարիզ, Լոնդոն, Օքսֆորդ և Վենետիկ:

Ինչու համար էին այս և սրա նման նախորդ ճանապարհորդութիւնները. արդեօք թափառասիրութեան մի յատկութիւն էր խօսուած Մեսրոպ մագիստրոսի մէջ, զրգելով նրան շարունակ այցելել Եւրոպական քաղաքները: Այս

ճանապարհորդութիւնների մէջ մենք տեսնում ենք մագիստրոս վարդապետի և եպիսկոպոսի մի կարեւոր նպատակը: Մատենագրական գործունէութիւնն էր նրա այդ փայփայած նպատակը, որ զրգում էր նրան յաճախակի ձեռք առնել պանդխտութեան ցուպը և Վենետիկի ու Երուսաղէմի հնադարանները քրքրել: Սրա մասին մի քիչ յետոյ, իսկ առայժմ յիշենք նրա գրական աշխատանքները:

Մեսրոպ մագիստրոսը իր առաջին ուսումնական աշխատանքները կատարել է գերմաներէն լեզուով, մի շարք ուսումնասիրութիւններ տալով ժողովրդագրական նիւթերի մասին: Իսկ ընդհանրապէս հայոց հին գրականութեան վերաբերմամբ ուսումնասիրութիւններ գրել է «Արարատ», «Հանդէս ամսօրեայ» և «Ազգագրական Հանդէս» պարբերականներում: Ռուսերէն «Орхеопогический Вѣстникъ» թերթում գետեղել է մի շարք ուշագրաւ յօդածներ, հնագիտութեան վերաբերող:

Առանձին գրքերով լոյս տեսած նրա աշխատութիւնների մէջ աչքի են ընկնում՝ հայերէն, հին մատենագիրներից — «Սոկրատ», «Բարդամ և Յովսափ», «Սուրբ Մեսրոպի վարք» և այլն:

Ռուսերէն առանձին գրքով հրատարակել է Ս. Գրքի հայերէն թարգմանութեան պատմութիւնը «Исторія перевода Библии»:

Թարգմանութիւններ արել է ռուսերէնից, գերմաներէնից և անգլիերէնից: Ռուսերէն թարգմանութիւնների մէջ աչքի են ընկնում գլխաւորապէս պրօֆէսոր Մարրի յօդածները:

Գերմաներէնից թարգմանել է բիւզանդական կայսրների պատմութիւնը, որը լինելով պատմութեան համար մի կարևոր երկ, մասնաւորապէս հայոց պատմութեան տեսակէտից առանձին արժէք է ներկայացնում: Անգլիերէնից թարգմանել է Կեօննիքէրի «Դաւիթ անյաղթ»-ի ուսումնասիրութիւնը: Գրել է մի շարք քննադատական յօդածներ, եւրօպական և հայոց լեզուներով հրատարակած հայագիտական աշխատութիւնների մասին: Այս բոլոր աշխատութիւնները՝ թէ ինքնուրոյն, և թէ թարգմանական, արդէն ընօրոշում են Մեսրոպ եպիսկոպոսի մասնագիտութիւնը:

Հնագիտութիւնն է այդ ճիւղը, և մասնաւորապէս հայ կեանքն ու գրականութիւնը: Այդ սէրը դէպի իր ազգի անցեալի հնութիւնները և այդ հնութեանց ուսումնասիրութիւնը, գրդել է Մեսրոպ սրբազանին շարունակ ճանապարհորդել և այցելել հայագիտութեան նիւթեր մատակարարող գրադարանները եւրօպական և ասիական քաղաքներում: Եւ այդ սէրն էր պատճառ, որ Մեսրոպ վարդապետին ասիական յանձն առնել էջմիածնի մատենադարանապետի պաշտօնը, որ 1906 թւից սկսած անընդհատ վարում է և նա-

խանձելի վիճակի մէջ է գրել մատենադարանը թէ արտաքուստ և թէ ներքուստ: Իր անհատական ջանքերով էր, որ Մեսրոպը յաջողեցրեց մատենադարանի համար մի յստուկ շէնք կառուցանել: Մատենադարանի շինութիւնը գլուխ եկաւ պ. Դաւիթ Աւան-Իւզըբաշեանի ծախքով և նստեց մօտ 40 հազար ռուբլի: Այնուհետեւ Մեսրոպն զբաղեց մատենադարանի ներքին բարեկարգութեան խնդրով:

Բայց այս մատենագրական գործունէութիւնն առանձին նշանակութիւն չէր ունենայ և Մեսրոպի անունն այնպէս չէր կապի մեր հին մատենագրական պատմութեան հետ, եթէ չլինէր Մեսրոպի մի ուրիշ աշխատութիւնը: Այդ թարգմանութիւններն ու հրատարակութիւնները ոչ ժամանակի այն կորուստն են պահանջում և ոչ էլ տոկոսութեան այն ահագին աստիճանը, որ երևում է Մեսրոպի մի ուրիշ աշխատութեան մէջ:

Մեսրոպ եպիսկոպոսի գրական ամենամեծ և բազմաթիւ տարիների անդուլ աշխատանք պահանջող գործը հայոց ձեռագրների ցուցակագրութիւնն ու ուսումնասիրութիւնն է: Այդ աշխատանքը Մեսրոպ եպիսկոպոսն ոկսել է 1898 թւից և անընդհատ շարունակում է մինչև այսօր: Այդ բազմահատոր աշխատանքը կազմւած է ամենուրեք գտնուող հայ ձեռագիրների ժողովածուներից և հրատարակւած ձեռագրների ցու-

ցականքից: Եւրոպական և ասիական քաղաքների մատենադարաններում եղած բոլոր ձեռագրների ոչ միայն համեմատական ցուցակն է կազմւած, այլև ձեռագրների մէջ եղած տարբերութիւններն է դրւած իրար հանդէպ միեւնոյն ժամանակի և նոյն անցքերի վերաբերմամբ: Օրինակ՝ հնթագրենք թէ մէկն ուզում է ուսումնասիրել Հայաստանի վիճակը Մոնղոլական արշաւանքների ժամանակ: Մետրոպ եպիսկոպոսի այս աշխատութիւնը ձեռքի տակ ունենալով, նա կարող է իմանալ՝ նախ թէ այդ նիւթին վերաբերող ի՞նչ ձեռագիրներ կան և թէ նրանք որտեղ են գտնւում, նրուսագէմում արդեօք, թէ Լոնդոնում. և երկրորդ՝ կարող է իմանալ թէ այդ շրջանին վերաբերող պատմագիրները ի՞նչ տարբերութիւն ունին միմեանցից՝ միեւնոյն անցքը կամ ժամանակամիջոցը նկարագրելիս:

Այս հսկայական աշխատութիւնը, որի լոկ տպագրութիւնը 20—25 հազար ըուբլիով հազիւ գլուխ գայ, կարող էր պատիւ բերել իւրաքանչիւր բանասէրի, ուր մնաց որ այդ բանասէրը Մետրոպն է: Իսկ Մետրոպը, ինչպէս տեսանք, հոգեւոր ասպարէզ մտնելու օրից շարունակ զբաղւած է եղել, և մատենագրականից գատ, միւս ասպարէզներում էլ կարեւոր գործունէութիւն է ցոյց տւել:

Մետրոպ մագիստրոսի մատենագրական գործունէութիւնը իր անհերքելի արդիւնքների հետ

մեր առաջ դնում է այդ տոկուն հոգեւորականի մի աչքի ընկնող յատկութիւնը և միւս կողմից մի ուսանելի երևոյթ է ասպարէզ հանում: Մատենագրական ամենախոշոր աշխատութեան գնահատութիւնը թողնելով ապագային, երբ այդ բազմահատոր ձեռագիրը կը տպագրւի և հայ բանասէրների ընդհանուր սեփականութիւն կը դառնայ, այժմ Մետրոպի մի կարեւոր յատկութիւնը շեշտենք, որ այնպէս ցայտուն կերպով երևում է այս աշխատութիւնների հետ ծանօթանալուց յետոյ և որը այնպէս պակասում է մեր այժմեան ոչ միայն հոգեւորականութեան, այլև աշխարհիկ մտաւորական շրջաններից: Այդ՝ Մետրոպի համեմատութիւնն է, իր աշխատութիւնների վերաբերմամբ: Մինչդեռ մեզանում սովորութիւն է, երկու տող գրելուց յետոյ հռչակել նշանաւոր հրապարակախօս կամ մատենագիր, լրագրների ամբողջ էջեր հեղհեղել յայտարարութիւններով ու ռեկլամներով իրենց աշխատութիւնների մասին, Մետրոպը մի յամառ համեմատութիւն է պահպանել միշտ և երբէք չի աշխատել սրան կամ նրան զարմացնել իր գործերով: Շատերը մեր բանասէրներից տեսել ու հիացել են նրա այս հոյակապ աշխատութիւններով, շատերը օգտուել են նոյնիսկ դեռ չաւարտած ձեռագրից, սակայն միշտ Մետրոպի անունը անյայտութեան մէջ է մնացել:

Միւս կողմից այս գործում ուսանելի է

Մեսրոպ եպիսկոպոսի՝ գործունէութեան տենչը: Այն բոլոր պաշտօններն ու պարտականութիւնները, որ կատարել է քսան տարւայ ընթացքում այս եպիսկոպոսը, եթէ կատարէր մի ուրիշը մեր հոգևորականներից, գուցէ խղճի ամենայն հանգստութեամբ իր մնացած ժամանակը նւիրէր իր հաճոյքին ու անձնական բարեկեցութեանը:

Իր ամբողջ ժամանակը նւիրել հասարակական գործին, պարտականութիւններից դուրս եղած ժամանակն էլ նւիրել գիտութեան ու մատենագրութեան ծառայութեանը, կարող են միայն այն մարդիկ անել, որոնք լցւած են յաւատե գործունէութեան մի անկեղծ եռանդով և պորտաբուծութեան սիրահարներ չեն:

Բայց այս մատենագրական գործունէութեան խոշոր նշանակութիւնը այդ չէ:

V

Ծնւած մի հայկական խուլ խրճիթում, անւած պատմական Սիւնիքի աւանդութիւններով ու ամեն քայլափոխում հանդիպող պատմական յիշատակարաններով, մանուկ Մեսրոպի մատաղ սիրտը կապւած է եղել այդ յիշատակարանների բեկորների հետ. սկզբնական կրթութիւնն ստանալով հայկական եռուն միջավայրում, նրա պատանեկութեան տարիները դարձան կեանքի մի կենդանի դպրոց իր ժողովրդին հիմնականօրէն ծանօթանալու համար: Այս ծանօթութիւնը, սակայն, շահագործելու համար հարկաւոր էին գիտութեան կուռ զէնքեր, որ Մեսրոպին չէր տալիս հայրենի միջավայրը: Այդ զէնքերը նա ստացաւ օտար միջավայրում, ուսնական և եւրոպական համալսարաններում: Եւ այս յետագայի ժամանակամիջոցում է, որ Մեսրոպը լայնացնում է իր աշխարհահայեացքը, ծանօթանում է օտար կեանքի ու պատմութեան հետ: Սակայն հիմքը հայրենագիտութիւնն է. օտարը նրա համար նորեկ բան է, և պատւաստւում է այս հայրենական հիմքի վրայ:

Մագիստրոսական աստիճանն ստացած երիտասարդ Մեսրոպը բնական է, որ իր ապագայ

գործունէութիւնն հիմնէր հէնց այդ սկզբնական գանձի վրայ, որ ստացել էր մանկութեան ու պատանեկութեան հասակում: Օտար միջնորդատու իւրացրած գիտական գէնքերը այժմ՝ ուղղւում են դէպի հայրենի անցեալի ու մտքի մշակութիւնը: Եւ Մեսրոպը ամփոփւում է իր խցի մէջ, կատարելու այն աշխատանքը, որ կողմնակի նայողին զարմանք միայն կարող է պատճառել: Մօտ քսան տարի թերթել և ուսումնասիրել է էջմիածնի բազմաթիւ ձեռագիրները, Սեւանի ու Վենետիկի, Երուսաղէմի և Լոնդոնի բոլոր յիշատակարանները, որոնք կապ ունին հայ անցեալի, գրականութեան, պատմութեան ու կրօնի հետ: Այս աշխատանքով Մեսրոպ Մազիստրոսը ձեռք է բերում մի արժանիք, որ պակասում է մեր շատ հոգևորականներից և որ ուրանում են նրա հակառակորդները: Նրանք ապում են թէ Մեսրոպը ծանօթ չէ հայ եկեղեցական կարգերին ու օրէնքներին, ծիսական հիմունքներին և նոյնիսկ միամտութիւն ունին կարծելու թէ որևէ մէկը, եթէ լինէր Մեսրոպի տեղը, պիտի դուրս գար այդ անհիմն մեղադրանքին պատասխանելու: Եւ իրօք, կարելի է մէկին մեղադրել Աւետարանի անծանօթութեան մէջ, որը ոչ թէ «մի աւետարան» է կարգացել, այլ հարիւրաւոր ձեռագիր աւետարաններ համեմատելով իրար հետ, նշմարել ու ընդգծել է զրանց մէջ նկատուող ամենաչնչին տարբերու-

թիւնները: Կարելի է մէկին համարել հայ եկեղեցական կանոնների մէջ տգէտ, կամ հայ պատմութեանը անծանօթ, քանի որ այդ կանոններն ու պատմութիւնը ամփոփւած են ամենաընդարձակ կերպով հայ ձեռագրների մէջ, դեռ չուսումնասիրւած ու չհրատարակւած յիշատակարանների մէջ, իսկ Մեսրոպ Մազիստրոսը մի պատկառելի ժամանակաշրջան է մաշել այդ ձեռագրների ու յիշատակարանների ուսումնասիրութեան վրայ:

Եւ այդ ուսումնասիրութիւնը կատարել է գիտութեան ու հնագիտութեան վերջին պահանջների համաձայն:

Մեսրոպի այս ձեռագիր աշխատութիւնը իր բոլոր արժանիքների հետ գալիս է մեզ ասելու և այն, որ Մազիստրոս եպիսկոպոսը օժտւած է հայ կեանքի անցեալի ու ներկայի խորին ծանօթութեամբ, իսկ այս յատկութիւնը ևս մի անհրաժեշտութիւն է այն անձի համար, որ կոչւում է հայ եկեղեցու բարձր պաշտօնէութեան:

Այսպիսով մենք տեսնում ենք, որ Մեսրոպ եպիսկոպոսը խոշորագոյն չափերով ունի այն յատկութիւնները, որոնք այսօր դրւած են հրապարակ, իբրև արժանիքներ ապագայ հայ կաթողիկոսացուի: Նախ՝ ժողովրդական սկզբ-

բունքների կողմնակից—այս յատկութիւնը պիտի առաջին բանը սեպւի մեր այժմեան կաթողիկոսացուի համար: Երկրորդ՝ խելօք դիւանագիտութիւն և վարչական ընդունակութիւն—այս յատկութիւնն ևս առաջնակարգ պահանջ է, քանի որ վերջին տարիների ռուսահայ պատմութիւնը ցոյց տւեց թէ որքան բան է կախւած դրանից, և թէ որքան են տուժում մեր եկեղեցին ու կուլտուրական-ազգային հիմնարկութիւնները, մեր վարիչ շրջանների վարչական սնանկութիւնից: Եւ վերջապէս ներկայի ու անցեալի ծանօթութիւնը: Իսկ մի մարդ կարող է իր շրջապատը սիրել, եթէ կապւած է այդ շրջապատի հետ խոր ծանօթութեամբ: Այս բոլոր յատկութիւնները ի մի հաւաքելով, կրտսնենք որ յանձին Մեսրոպ եպիսկոպոսի, հայ ժողովուրդը կունենայ մի փորձառու, բայց տարիների բեռով դեռ չծանրացած հոգևոր առաջնորդ:

Այս բոլորի հետ շեշտելի է նաև այն հանգամանքը, որ Մեսրոպ եպիսկոպոսը օժտւած է մի բացառիկ անշահախնդրութեամբ: Այն բոլոր թերութիւնները, որոնք կապ ունին դրամի ու շահի հետ և որոնք այնպէս առատօրէն բոլորում են այս կամ այն հոգևորականի անւան շուրջը մեր լրագրութեան մէջ, ամենևին չեն մօտենում Մեսրոպի անւանը, որովհետև նա դրամական հաշիւներում ծայրայեղ բժախնդիր

է եղել շարունակ և ինքն էլ սակաւապէտ հոգևորական: Բնաւորութեամբ կորովի և միաժամանակ շրջապատողների հաճոյքին ծառայելու արտաւոր յատկութիւնից գերծ: Այդ է պատճառը, որ նա իր բարեկամների հետ ունի և բազմաթիւ հակառակորդներ. սակայն այս հակառակորդներն էլ, որքան նրա վրայ յարձակւելու լինին, այնուամենայնիւ լցւած են մի զաղտնի յարգանքով դէպի նրա անձնաւորութիւնը:

Այս գիտնական եպիսկոպոսի ներկայութիւնը հայ բարձր հոգևորականների շրջանում պատիւ է բերում այդ հոգևորականութեանը, և նոյնքան պատիւ կը լինի այդ հոգևորականութեանն ու հայ ժողովրդին, եթէ սրանք իրենց արժանաւոր զաւակին կանչեն դէպի կաթողիկոսական բարձր ու պատառնանաւոր գահը: Մեր խորին համոզումով Մեսրոպ Մագիստրոսը շնորհիւ իր պատրաստականութեան ու աշխարհահայեացքի կը կարողանայ մի անջնջելի հեռք թողնել հայ կաթողիկոսների պատմութեան ցանկում և, հայ եկեղեցու բարենորոգութեան ու կուլտուրական հիմնարկութիւնների կանոնաւորութեան մի փայլուն շրջան ստեղծել:

ՀԱՅԿԱՅԻՆ ԳՐԱԴԱՐԱՆ

« Ազգային գրադարան



NL0170280

ԳԻՆՆ Է 20 ԿՈՂ.